

VENDIM

Nr. 161, datë 11.04.1994

PËR MIRATIMIN E STATUTIT TË INSTITUTIT TË SIGURIMEVE SHOQËRORE

(Ndryshuar me Vendimin e Këshillit të Ministrave nr. 1022, datë 9.7.2008, dhe me Vendimin e Këshillit të Ministrave nr. 264, datë 7.5.2014)

Në mbështetje të nenit 78, të Ligjit nr. 7703, datë 11.5.1993 "Për sigurimet shoqërore në Republikën e Shqipërisë", me propozimin e Këshillit Administrativ të Institutit të Sigurimeve Shoqërore dhe të Ministrit të Punës, Emigracionit e Përkrahjes Sociale, Këshilli i Ministrave

VENDOSI:

- 1.** Miratimin e "Statutit të Institutit të Sigurimeve Shoqërore", që i bashkëngjitet këtij vendimi.
 - 2.** Vendimi i Këshillit të Ministrave nr. 391, datë 3.9.1992 "Për miratimin e statutit të Institutit të Sigurimeve Shoqërore", shfuqizohet.
- Ky vendim hyn në fuqi menjëherë.

KRYETARI I KËSHILLIT TË MINISTRAVE

Aleksandër Meksi

STATUTI
I INSTITUTIT TË SIGURIMEVE SHOQËRORE

KREU I
KRIJIMI DHE VENDI

Neni 1

(Ndryshuar me VKM nr. 1022, datë 9.7.2008)

Instituti i Sigurimeve Shoqërore është institucion publik, i pavarur. Organizimi dhe funksionimi i këtij instituti, që më poshtë do të quhet ISSH, rregullohen me ligjin nr. 7703, datë 11.5.1993 "Për sigurimet shoqërore në Republikën e Shqipërisë", të ndryshuar.

Neni 2

(Ndryshuar me VKM nr. 1022, datë 9.7.2008)

ISSH-ja është person juridik, shqiptar, me qendër në Tiranë, dhe përbëhet nga drejtoria qendrore, drejtoritë rajonale dhe agjencitë lokale të sigurimeve shoqërore, që veprojnë në të gjithë vendin.

KREU II

FONDET THEMELORE, BURIMET E FORMIMIT DHE PËRDORIMI I TYRE

Neni 3

ISSH-ja administron fondin e sigurimeve shoqërore në mënyrë të pavarur. Të ardhurat realizohen dhe shpenzimet kryhen sipas ligjit nr. 7703, datë 11.5.1993 "Për sigurimet shoqërore në Republikën e Shqipërisë".

Neni 4

(Ndryshuar me VKM Nr. 1022, datë 9.7.2008)

Fondi i ISSH-së administrohet në pesë degë të veçanta:

- Dega e sigurimit për sëmundje;
- Dega e sigurimit për barrëlindje;
- Dega e sigurimit për pensione;
- Dega e sigurimit për aksidente në punë dhe sëmundje profesionale;

- Dega e sigurimit të papunësisë.

Llogaria e sigurimeve shoqërore mbahet në Bankën e Shqipërisë, ndërsa llogaria e shpenzimeve administrative mbahet në llogari të veçantë.

Transferimet për pagesën e kontributeve e të shpenzimeve administrative lejohen vetëm me ligjin e buxhetit.

Neni 5

(Ndryshuar me VKM nr. 1022, datë 9.7.2008)

ISSH-ja krijon një fond rezervë, të barabartë me shumën e pagesave që nevojiten për të përballuar të paktën 3 muaj shpenzimet për pensione.

ISSH-ja krijon një fond rezervë, të barabartë me shumën e pagesave, që nevojiten për të përballuar, të paktën 3 muaj, shpenzimet për pensione.

Fondi rezervë mbahet në një llogari të veçantë.

KREU III

VEPRIMTARIA E INSTITUTIT TË SIGURIMEVE SHOQËRORE

Neni 6

(Ndryshuar me VKM nr. 1022, datë 9.7.2008)

Veprimtaria e Institutit të Sigurimeve Shoqërore përfshin:

- i) arkëtimin e detyrimeve, që rrjedhin nga derdhja e kontributit të punëmarrësve, punëdhënësve dhe të të vetëpunësuarve;
- ii) pagimin e përfitimeve të sigurimeve, sipas dispozitave ligjore;
- iii) investimin e fondit rezervë, me qëllimin rritjen e tij."

Neni 7

(Ndryshuar me VKM nr. 1022, datë 9.7.2008)

Instituti i Sigurimeve Shoqërore, nëpërmjet drejtorive rajonale dhe agjencive lokale, kryen veprime për sigurimin shoqëror.

Drejtoritë rajonale caktojnë pensionet, në bazë të dokumenteve të paraqitura nga personat e interesuar.

Përfitimet afatshkurtra për të punësuarit caktohen dhe paguhen nga punëdhënësit e tyre dhe, pas miratimit, rimbursohen nga drejtoritë rajonale të sigurimeve shoqërore dhe agjencitë e sigurimeve shoqërore.

Përfitimet afatshkurtra për të vetëpunësuarit dhe pensionet e të gjitha llojeve paguhen nga agjencitë paguese financiare, të specializuara, për llogari të fondeve të sigurimeve shoqërore, sipas marrëveshjeve, që lidhen, ku përcaktohet edhe masa e komisionit.

Neni 8

ISSH-ja, për shërbimet që u bëhen personave të siguruar, mban shpenzimet e kryera të barabarta me vlerën e materialit të shpenzuar nga ky institucion.

KREU IV

KONTABILITETI DHE BILANCI I ISSH-së

Neni 9

Viti financiar i ISSH-së është vit kalendarik, 1 janar deri më 31 dhjetor.

Neni 10

(Ndryshuar me VKM nr. 1022, datë 9.7.2008)

ISSH-ja mban regjistrat dhe librat, në përputhje me ligjin për kontabilitetin, manualin kontabël, miratuar nga Ministria e Financave, si dhe rregulloren financiare, miratuar nga këshilli administrativ.

Neni 11

(Ndryshuar me VKM: nr. 1022, datë 9.7.2008; nr. 264, datë 7.5.2014)

ISSH-ja përgatit raportin dhe llogaritë financiare në fund të çdo viti financiar, si dhe harton projektbuxhetin e vitit ushtrimor. Ato përfshijnë bilancin, llogaritë e të ardhurave e të shpenzimeve dhe evidencat e tjera përkatëse. Raporti vjetor dhe programi i veprimtarisë së ardhshme financiare miratohen nga këshilli administrativ i ISSH-së dhe i paraqiten, çdo vit, nëpërmjet ministrit përgjegjës për çështjet e sigurimeve shoqërore Këshillit të Ministrave.

Neni 12

(Ndryshuar me VKM nr. 1022, datë 9.7.2008)

- 1.** Këshilli administrativ, pas miratimit të buxhetit, miraton ndarjen e buxhetit, sipas drejtorive rajonale.
- 2.** Në përbërje të ISSH-së ngrihet njësia e auditimit të brendshëm, e cila auditon veprimtarinë e strukturave të saj jo më pak se një herë në dy vjet. Drejtuesi i njësisë së auditimit të brendshëm emërohet/shkarkohet me propozimin e Drejtorit të Përgjithshëm dhe me miratimin e këshillit administrativ. Drejtuesi i njësisë raporton periodikisht dhe sipas kërkesave të këshillit.

KREU V

DREJTORI DHE ADMINISTRIMI I ISSH-së

Neni 13

(Shfuqizuar me VKM nr. 1022, datë 9.7.2008)

Neni 14

Këshilli administrativ zgjedh me votim të fshehtë kryetarin dhe 2 nënkryetarët, të cilët drejtojnë veprimtarinë e këshillit.

Kryetari zgjidhet nga 6 përfaqësuesit e ministrive, kurse 2 zëvendëskryetarët një nga sindikatat dhe një nga punëdhënësit.

Neni 15

Këshilli administrativ mbledhet jo më pak se 4 herë në vit.

Neni 16

Mbledhja e këshillit administrativ thirret nga kryetari, nga dy nënkryetarët e tij dhe nga drejtori i përgjithshëm i ISSH-së. Ky i fundit ka të drejtë të mbledhë këshillin administrativ kur interesat e ISSH-së kërkojnë vendime të shpejta, që nuk janë në kompetencë të tij.

Neni 17

Mbledhja e këshillit administrativ njoftohet me shkrim të paktën 10 ditë përpara, duke bërë të ditur edhe rendin e ditës. Kur mbledhja e këshillit administrativ thirret nga drejtori i përgjithshëm i ISSH-së, mund të mos zbatohen kriteret e mësipërme.

Neni 18

Mbledhja është e vlefshme kur janë të pranishëm dy të tretat e anëtarëve, duke përfshirë së paku një përfaqësues të punëdhënësve dhe të sindikatave si anëtarë të këshillit administrativ.

Vendimet merren me shumicë votash.

Nëse shumica nuk arrihet, mbledhja shtyhet për ditën tjetër, duke bërë edhe njëherë njoftimin e pjesëmarrësve. Për mbledhjen e përsëritur do të jetë e nevojshme gjysma e anëtarëve, duke përfshirë një përfaqësues nga punëdhënësit dhe një nga sindikata. Megjithatë, vendimet merren vetëm me dy të tretat e votave.

Neni 19

Për mbledhjet e këshillit administrativ mbahet procesverbal. Kryetari autorizon një person të përhershëm për mbajtjen e tij.

Vendimet e këshillit administrativ nënshkruhen nga kryetari ose një nga nënkryetarët dhe depozitohen në drejtorinë e ISSH-së.

Neni 20

Vendimet e këshillit merren me shumicë absolute votash. Anëtari i këshillit administrativ ka të drejtën e një vote. Në rastet kur votat barazohen, vendos vota e kryetarit të këshillit administrativ.

Neni 21

(Shfuqizuar me VKM nr. 1022, datë 9.7.2008)

Neni 22

Anëtarët e këshillit administrativ hiqen nga detyra kur:

- a) dënohen për vepra penale;
- b) japin dorëheqjen;
- c) marrin pjesë ose ndihmojnë në korrupsion;
- ç) janë të paaftë për kryerjen e detyrës.

Neni 23

Anëtarët e këshillit administrativ të ISSH-së marrin një shpërblim për pjesëmarrje, masa e të cilit caktohet nga vetë këshilli administrativ.

Neni 24

(Shfuqizuar me VKM nr. 1022, datë 9.7.2008)

Drejtori i përgjithshëm i ISSH-së zgjidhet nga këshilli administrativ i ISSH-së. Ai përfaqëson ISSH-në dhe drejton veprimtarinë e tij.

Përgjigjet për administrimin dhe raporton çdo vit për veprimtarinë e ISSH-së në këshillin administrativ. Shfuqizuar.

Neni 25

(Shfuqizuar me VKM nr. 1022, datë 9.7.2008)

Neni 26

(Shfuqizuar me VKM nr. 1022, datë 9.7.2008)

DISPOZITA TË PËRGJITHSHME

Neni 27

ISSH-ja ka të drejtë të lëshojë udhëzime, urdhëresa dhe akte të tjera administrative, në mbështetje të akteve ligjore dhe kompetencave që janë dhënë.

Neni 28

(Ndryshuar me VKM nr. 1022, datë 9.7.2008)

ISSH-ja ka të drejtë të bashkëpunojë dhe të lidhë marrëveshje a të kryejë veprimtar i të përbashkëta me institucione homologe, vendase ose të huaja, në fushën e sigurimeve shoqërore.

Marrëveshjet me karakter ekonomik, para nënshkrimit nga Drejtori i Përgjithshëm, si përfaqësues i ISSH-së, i paraqiten, paraprakisht, këshillit administrativ, për miratim.

Drejtori i Përgjithshëm ka të drejtë të bashkëpunojë dhe të lidhë marrëveshje a të kryejë veprimtari të përbashkëta me institucione homologe, vendase ose të huaja, në fushën e sigurimeve shoqërore, vetëm pas miratimit të këshillit administrativ.

Neni 29

ISSH-ja ka të drejtën e depozitimit, të përdorimit dhe investimit të mjeteve të tij financiare në bazë të ligjit, rregullores financiare dhe vendimeve të këshillit administrativ.

Neni 30

Nga veprimtaria e ISSH-së caktohet një fond në lekë e në valutë që përdoret për pagesat e kuotacionit të anëtarësisë në ISSA për seminare, kurse e specializime brenda e jashtë vendit, si dhe për pajisje për pritje e përcjellje delegacionesh e specialistësh të huaj, madhësia e të cilave caktohet nga këshilli administrativ.

Neni 31

ISSH-ja ka stemën dhe vulën e tij me shenjat e stemës së Republikës së Shqipërisë.

Neni 32

Për problemet që nuk janë të përcaktuara në këtë statut, rregullimi do të bëhet me vendim të këshillit administrativ, brenda kompetencave që lejojnë dispozitat ligjore në fuqi.

Neni 33

Ky statut hyn në fuqi në datën e miratimit të tij nga Këshilli i Ministrave dhe i shtrin efektet që nga data e krijimit të ISSH-së.